

## Txiau Txiau Ryberiti

<sup>1</sup> Jiarỹ Txiau rare. Deuxu Jesuisi Kristu In-nyrỹ-wana deòdu rare. Ròritidỹřeri Deuxu mahãdu inatyhy-ò. Ubỹtỹmy iny rỹira mahãdu-ò. Warybe weityhyna adeereny rewahinyreri.

<sup>2</sup> Waityhydỹřdu aõna aõnasira seriòre, araurihixinanykeki adeereny kanamyhỹkeki, beysamahãbenyke.

<sup>3</sup> Kia-di tahe ityhydỹřdu tyhymy beleke.

<sup>4</sup> Aurihixina ixinamy rexiòlònyke atyhykemy. Ixinamy kanake araurihikemy. Tai tahe raòbitidỹřnykre adee aõ rasiranyòtyhy.

<sup>5</sup> Inyõ bedeery ihoõkeki, rexitòenykre Deuxu dee, tii dori ibutu dee riwahinymyhỹre. Inyõ lau dori ritòenyòhyymyhỹre.

<sup>6</sup> Urile tii iseòdỹřõmy bexityhynymy tamy bex-itòenykre. Riseõnykeki yhy òbò-di tiò rehumyhỹre wese rare.

<sup>7-8</sup> Kia hãbu iõreki, awimy aõkõ aõhebo rotỹřnymyhỹre ywiõreki, tii Deuxu-ribi aõ ritaòtyhy, irybe inatxire.

<sup>9</sup> Iny aõ ijòkõmy rỹimyhỹre, teysamy rỹirake, aõ ijòdikreki Kristu dori rityhynyre. Kia iaòdimy ityhymy rỹira, tule teysamy rỹike ityhydỹřdumy. Rỹiraki aõ ijòõkre hãre.

<sup>10</sup> Ityhyna heka iny-ribi wylemy ituemyhỹre kie iwese nojese ramorõmyhỹre wese. Tahe ityhydỹřdu mahãdu dee kia aõ aõkõ rare.

<sup>11</sup> Txutòteetyhy ròhònymyhÿre dori alòbòròna rimoròdÿÿnymyhÿre. Tahe noijsese rejuxunymyhÿre. Tahe iruxerana riixãwidinymyhÿre. Kia wesele hãbu ityhymy rÿire rexihumyhÿre. Aõhebo rotÿÿnymyhÿre wetyatxile.

<sup>12</sup> Urihixina inyõdee kanakeu, tahe ijesu binaõ wesemy ritakeki. Tai tahe tii reysakre. Tii tahe umytuedeõna heka Deuxu-ribi ritakre. Deuxu dori kia wahidÿÿnamy rarybere taluunadu mahãdu dee.

<sup>13</sup> Inyõ aõbina bina ixirana-di rexirakeki. Tii rarybeõtyhyke Deuxu riixiranymyhÿremy. Inyõ dori Deuxu tiu riurihiõtyhy. Tule Deuxu riixiranyõtyhy aõbina bina widÿÿ-di. Ixiradÿÿdu aõkõ tii rare.

<sup>14</sup> Kiawese iny ixiribile rexirake, aõ-di sõwemy rõhõtinykeki, tii arabònyre, araitxenanyre.

<sup>15</sup> Kia urari-ribi tahe òraruna ròhònymyhÿre. Iribi tahe òraruwidÿÿna-ribi rubu rÿimyhÿre.

<sup>16</sup> Ixixenadÿÿõmy waluuna mahãdu, waseriòre mahãdu.

<sup>17</sup> Wahidÿÿna ibutumy bedeerydÿÿnatyhy Deuxu biu-ribi diwahinyde kia ibutumy loosònatyby-ribi naderi. Tiu heka rawitxiraõtyhy, tii aõu aõu iweselere.

<sup>18</sup> Tii iny ixityre riwinymyhÿre ritÿmyranymyhÿre tatyhyna rybe-di. Tai ibutumy iwidÿÿna-ribi inyboho juhuurennyre, awirenyre.

<sup>19-20</sup> Idi mohõtinybenyke waluu waseriòre mahãdu. Ibutumy bexiywinymahãbenyke iny-ò boholamyhÿbenyke, tahe aõwimy aõkõ marybeke lau, wymy adebureõmy. Hãbu debure-ribi Deuxu òbitina rahenyõtyhy.

<sup>21</sup> Abinamy aõhebo tutỹỹnymyhỹte ixi-ribi bitake idi biatyke. Tahe Deuxu rybe-ò boholake, kia dori iruruna dire atyytyby kanatakemy.

<sup>22</sup> Kaiboho bede ywina widỹỹdumy, bede ywina tyhydỹỹdumy boibeke. Aõ ijohonadu mahådulemy aõkõ boibeke. Kiawesekeki bexiitxenanyke.

<sup>23-24</sup> Inyõ ijohonadule ronykeki, rybemynamy nodu aõkõ rare. Tii hãbu itxerena-di itxerenadu wese rare. Itxerena-di ixidee retehereu, rexieryre iwese raremy. Tahe rexitareu, aõwesele ixi-ribi tõhõti rosare timybo tii rare wahe.

<sup>25</sup> Inyõ tahe bede ywina òbiti-ò retehemyhỹreki, rityhynymyhỹreki tii tahe teysamy ratxikremy ibutumy aõhebo rotỹỹnykremy. Tii dori ijohonamy nohõti losadu aõkõ rare. Bede ywina rybe widỹỹdu rare, ityhydỹỹna wahe.

<sup>26</sup> Inyõ bede ywina rybe widỹỹduõmy rõhõtinykeki, tahe tõrõtò riyrubunyõhyyymyhỹkeki, tabedeywidỹỹna aõ aõkõ rare. Tii tawokile rexiitxenanymyhỹre.

<sup>27</sup> Iny Deuxu, Inytyby-ò kia bede ywina widỹỹna òbiti rare. Uladuwyte, wytese-wana riwiòhenanykemy. Tule aõbina bina aõmydỹỹnana widỹỹõmy.

## 2

<sup>1</sup> Waseriòre mahãdu, kaiboho Inynyrỹ Jesuisi Kristu, tetyhynytenyte loosõna wedu tii rare. Tai iny wiribi lahitxiõmy, wiweseweselemy iny-di atx-imahãbenyke.

<sup>2</sup> Kie inyõ tahe dohodỹỹnawo-ò kanalòkeki, womati debo tỹrỹrỹ-di tywihikỹ-di kanalòkeki, tahe tule iny aõkõdu mahãduõ kanalòkeki.

3 Kai tywihikỹ dinodu-ò marybekeki: Kaò bodonyke rynawihikỹ-ò. Tahe marybekeki iaõkõ-ò: Kiakile myike lamalemy ada bede-txi aõbo bonyke.

4 Kia wese wiribi hitxidỹ-ki tatỹnymyhỹtenyete, araykyreny rabinamy kia wese tumahãre.

5 Boholake, waseriòreboho, kaiboho juhoo iny aõkõ mahãdu wese toite. Iribi ityhy ityhydỹdukõdu mahãdu iaõrarumy roirekemy, kaiboho Deuxu weselemy tadeletenyete atyhyna òraru-ki. Aratamyhỹrenyete inatyhyna-di ityhydumy boibekemy, tule kaiboho kowa biu-ò hena bitabenykre. Deuxu dori rarybere: —Waluudu mahãdu tuu arisỹnykre.

6 Kiawese, kaiboho urimynodu derarenyete aõhebo tatỹnyteri. Ityhy mahãdu tahe ararutỹkỹnymyhỹre tule aradyrenymyhyre soldadu dohodỹna heto-ò.

7 Tiiboho tule Kristunimy aõbinamy rarybemyhỹrenyete. Kaiboho ini-di texininimyhỹtenyete.

8 Kia bede ywina rybe-ki roire: iwese ixilure wese, aerykõdu mahãdu luuke, wiery mahãdu wahe, abireludu wahe. Kia bede ywina biywinykeki, awimy botỹnymy mabeke.

9 Tahe iny wiribi lahitxinykeki, taòrarunyteri, teywinyõteri. Bede ywina aõkõ atximahãte.

10 Inyõ tahe bede ywina rybe ibutumy riwinykeki, tahe sohoji aõmydỹna riwinyõreki, tai tahe bede ywina rybe ywidỹdu aõkõ ratxireri.

11 Deuxu tarybe ririre. Kia rarybera: —Òta òta widỹõmy. Tule rarybera: —Rubudỹõmy. Tai òta òta biwinyõkeki tahe inyõ terubunyteki, kai bede

ywina rybe yrubudỹđdu aõkõ atxiteri. Òrarudumy tate.

<sup>12</sup> Iwese iny bede ywina rybe-di tỹmyra ahãbenyke. Deuxu dori bede ywina-di arararutxỹnyrenykre. Taita òbitimy botỹỹnybenyke, marybebenyke.

<sup>13</sup> Inyõ riwotòenyõmyhỹkeki, tule tamy riwotòenyõleke tawiribihitxinatxu-u. Wotòedỹỹna wiribihitxina ratyre rare.

<sup>14</sup> Waseriòre mahãdu, inyõ rarybekeki: —Jiarỹ watyhyna ijõdire. Tahe iaõmydỹỹna wihikỹ-di aõkõ rare. Kia tahe aõ aõkõhyky heka rare tamy. Ityhy-nale kahãbu ritakekõ aõbo. Tahe reruinyreri.

<sup>15-16</sup> Inyseriòreõ tyy, rỹsỹna ihoõke-wana. Tahe inyõ tamy rarybekeki, ywina-di bõhònyke, aheto-ki biroxikemy. Tahe aõ riwahinyõra tyy, rỹsỹna-wana. Aõbohe irybe rare. Aõkõhykyre irybe.

<sup>17</sup> Kiawese taheka kia hãbu inatyhyna rare, iaõywidỹỹna ihoõkeki kia ityhyna ihoõke wese rare.

<sup>18</sup> Inyõ rarybeke-wana: —Kai atyhyna dire. Jiarỹ waõwidỹỹna ijõdire. Biteòsinyke wadee atyhyna sohojile tamyreny wina-di aõkõ. Tahe jiarỹ tamyreny waywina-di adee ariteòsinykre kia òraru-ki bobike jiarỹ Kristumy retyhynyrerimy. Watyhyna iny idiòre waõwidỹỹna ijõõre-wana.

<sup>19</sup> Kai bityhynyke Deuxu sohojile raremy. Kia tahe awire urile diabo tyytybybina tule Deuxu rityhynyre. Tai ilau ruberumyhyre.

<sup>20</sup> Inatyhyna iaõmy widỹỹnana ihoõkeki, aõ aõkõ wese rare. Kia tetyhynyõlemahãte aõbo, hãbu itxỹtere.

<sup>21</sup> Inylabiereny Abraõ tariòre-di Ijai

rixiwenykemy idi ratximyhỹu, kia-ki Deuxu riòbitinyre.

<sup>22</sup> Tabimahãte aõbo. Abraõ tatyhyna iwidỹỹna-wana aõna aõna riwinyre. Ityhyna riwiòhenanyre.

<sup>23</sup> Tahe iwese ritidỹỹnamy roire wesemy tuu rotỹỹnyre aõmybo heka rarybera Abraõmy: — Boholake, Abraõ heka Deuxu rityhynyre. Tai Deuxu tii riòbitidỹỹnanyre. Tule, Deuxu tabiòwamy rininire.

<sup>24</sup> Betehebeny ini. Inyõ iòbitidỹỹmy ronyke-wana inatyhyna sohojidile aõkõ tii ihỹke, tahe iwidỹỹna-di tule wahe.

<sup>25</sup> Ijõre tahe: Raabe, aderanamy raremyhỹ. Iribi tii Deuxu rybedeòdu mahãdu riyrubunyra rubu lau, tahe riteònyre rywasi wixira-di. Kia widỹỹna Deuxu Raabe riòbitidỹỹnyre.

<sup>26</sup> Iwese umy tyytyby-di aõkõ rubumy rỹimyhỹre wese, tule inatyhyna sohojile aõ aõkõ rare tamywina-di aõkõreki heka rubu wese rare.

### 3

<sup>1</sup> Uritere, waseriòreboho, bedeerydỹỹdu mahãdumy aõkõ xixi-di norenykõmyke. Ibede õnana hitxina txuu dorihe aõnihikỹkre bede erydỹỹdu mahãdu dee.

<sup>2</sup> Inyboho ibutumy sõwemy òraruna-txi aõu aõu resemyhỹrenyre. Inyõ tarybe-ki raòrarunyõkeki, tii iny òbiti rare.

<sup>3</sup> Iwese awaru iny riraòmyhỹre wese taumy ibutumy riraòmyhỹre. Awaruru-ki juraròsòna rirutymyhỹreu, tii iraròsòna-di rare. Tai tahe

awaru iny riywinymyhÿre iumy ibutumy iny riraòmyhÿre.

<sup>4</sup> Betehebenyke iny heòty lawò nihikÿ-ò iraròsòna iyjatyhyre tahe iraròsòdÿÿdu idile riraòmyhÿre titxibo inonana-ò yhy nihikÿ iwetxi kedeakreki, ihãrele iraròsòna riraòmyhÿre.

<sup>5-6</sup> Iwesele iny dòròtò rare. Iyjatyhyre ihãrele aõnihikÿmy rarybemyhÿre. Betehebenyke iny heòty helÿÿresi iyjare, ihãrele òtiranihikÿ ritoonymyhÿre. Dòròtò tahe heòty wese rare. Sõwemy heka òraru riwinymyhÿre. Dòròtò bede aõmydÿÿnanabina dinodu wese rare, inyumy susudÿÿdu dòròtò rare. Sõna bede tòtee-ribi diabo mahãdu-ribi heka nade.

<sup>7</sup> Ibutumy iròdu brebuna, nawii witxira witxira, iròdu beraludu, utura, riinytyhydÿÿnymyhÿre. Iny mahãdu iratyre irurudÿÿna dire.

<sup>8</sup> Inydòròtò inyò tahe riinytyhydÿÿnyòtyhy. Ibi-natyhy rare. Rubudÿÿna uri-di ratxireri.

<sup>9</sup> Inydòròtò-di Deuxu inytybymy iny reàlàmyhÿre tule idi inymy raujòmomyhÿre. Deuxu ixiwesemy iny riwinyre, ihãrele iny wimy raujòmomyhÿre.

<sup>10</sup> Inyò tary-di Deuxu rirowòwydynmahãre tule idi ujòmomy reamyhÿre. Waseriòreboho, kiamy aõkõ idi boibeke.

<sup>11</sup> Beijirana-ribi ibree ihÿre-wana wiule heka ròhònyòtyhy.

<sup>12</sup> Ówòru inatxi wiribi lahixire. Ijõ aõbo wiraty-di raratynyke aõkõre? (Figueira azeton-amy raratynyòtyhy) Videira figomy raratynyòtyhy. Juwyrabe hãloo-ribi bebreke ròhònyòtyhy.

<sup>13</sup> Inyò bederykeki ibedeerynadikeki, tii ywimy

ratximyhÿke. Ibutumy òbitimy ratxirerimy aõ riwinymyhÿremy rexityhynymy ixidi rõhõtinyõtyhy tyhymy rabekemy.

<sup>14</sup> Kaiboho awo-ki ixiburena ijõdikeki, inywitxira hãrosu ijõdikeki tai tii deysamy atxiõke tai tuu marybeõke. Kai ruiwidÿÿõmy.

<sup>15</sup> Kia bedeeryna biu-ribi aõkõ nade, bederibile, iny hãrosu diaboribile nade.

<sup>16</sup> Inywitxira hãrosu ijõdike-wana, tai jei jeina rare. Ibutumy aõbina bina.

<sup>17</sup> Bedeerydÿÿna biu ludu juhule òbiti rare, idi ywina rare, rutaõna rare, wityhyna rare, ruxetõena rare. Awihyymy nodu widÿÿna rare.

<sup>18</sup> Òbitina aõu aõu kanakre ywinawidÿÿdu-ò. Iwese aloborodu rehumyhÿre wese, tiiboho ywinamy rekoamyhÿrenyre.

## 4

<sup>1</sup> Aõherekibo ayreny-ki jei jei rÿimyhÿre. Awo-ribi namyhÿde araykywydyna ribi.

<sup>2</sup> Kai sõwemy aõdikemy tahõtinyinmahãte aõhebo aõkõ tetate. Tahe terubunymahãte. Inywixira aõmydÿÿna-di òbire, tahe aõkõre. Tai aõbina tete-lenymyhÿte ijei jei-di. Aõ ijõõre textitõenyõma hãteki.

<sup>3</sup> Textitõenyteki, tetaõmahãtenyte. Teòsamy dori textitõenymahãtenyte. Ixidee sohoji dehunalemy tahõtīnamahãtenyte aumydeewimy behukelemy.

<sup>4</sup> Bede aõmydÿÿnana luudu mahãdu heka Deuxu òludumy ihÿre. Kia aõbo teeryõtenyte, òbitiõna, mahãdu. Inyõ bede aõmydÿÿnana bina biòwamy ratxikeki, Deuxu òludumy rare.



5 Aõ aõkõ aõbohe rybe riti kawese roire: Aõhe rare. Deuxu taTyytybytyhy inywo-ki heka Deuxu risÿdÿÿnymyhÿre. Tai tahe iny-di riijetyhymy ratx-imyhÿre. Aõbo heka kia rare?

6 Tii tahe iny rirurutedÿÿnymyhÿre. Kawesemy ritina rarybere: –Ixiwedu mahãdu heka Deuxu xixi-ribi riredhedÿÿnymyhÿre. Tahe ruxetõena sõwemy xiwedekõ mahãdu-õ riwahinymyhÿre.

7 Deuxudeewi biwinymahãke. Diabo xixi-ribi birehedÿÿnykeki, tahe tii aribi rahenyke.

8 Deuxu-õ bexiõhòdÿÿnykeki. Deuxu adee rexìhòdÿÿnkre. Òrarudu mahãdu, ebõmy bexilyraranyke aòraru-ribi bexitake, rybe inatxi mahãdu, araykyworeny biõbitinybenyke.

9 Mabedewoke, bobuke, mahinyke aòraruna òraru-ki. Ajuedena-ribi arube rytynykre, eysa-ribi mabedewomy atxikemy.

10 Ayrubumy Inynyrÿko-txi boibekeki, tii arata-madÿÿnykre; tii ixideewimy riwinykemy.

11 Waseriõreboho, uritere aõmy wimy ryberenyõmy. Inyõ taityhydÿÿduseriõremy tuu ibinamy rarybekeki, iaõna aõna riaõkõkeki tii bede ywina ibinamy rarybereri. Bede ywina rybe riaõkõdÿÿnyreri. Inyõ bede ywina rybe riaõkõnykeki, tii bede ywina ywidÿÿdu aõkõ rare. Tii bede ywina rybe hitxidÿÿdu rare.

12 Deuxu sohojile dori bede ywina hitxidÿÿdure. Bede ywina dohodÿÿna dinodu tii rare. Tii itarasadÿÿdu rare ihãre irubudÿÿdule rare. Mobohe kai atxiteri; abireludu hitxidÿÿmy aõbo texinohõtidÿÿnyteri? Aõkõre.

13 Boholabenyke, tuu tarybetenyteri: wijile aõbo ada biurasòmý aõbo rokoirenykre hãwãõ-ò. Tai bededỹñana sohojimy rikierenykre. Tai nieru tarasamy rakaõmysỹdỹñenykre.

14 Txiòhe rare. Kaibohe dori teeryõlemahãtenyte aõhebo bedede rotỹñenykre. Timybo mabekre? Iwese biuwetyy yja aõwesele rexihymyhỹre wese heka timybo mabekre? Kiawesemy aõkõ marybeke.

15 Kamy heka marybeke: –Inynyrỹdeewikeki iny rummy rokoireke, tai tahe kia ada kowa aõbo riki-winyrenyke.

16 Iwese wiji ratximyhỹre wese. Biurasou aõnihikỹ widỹñmy marybekeki, kia tahe awi aõkõ rare.

17 Inyõ aõwiwidỹñ rieryekeki, tahe ri-winyõmyhỹ-wana kia rexiòrarunanymyhỹre.

## 5

1 Boholabenyke warybe-ò ityhy mahãdu. Mahinybenyke, bobubenyke aõhõkỹmy botỹñnybenykreki.

2 Aõmydỹñana wiwihikỹ rabinamy rỹire. Atyy-wityhy isibrey tysini riròre.

3 Aorotỹrỹreny awomatiurareny raruxinyra tabededỹñana riõnonyrerimy. Anieru susudỹñna awobiredỹñnamy kiditỹnynykre. Iwese dee heòty risõmyhỹre wese, kia sudỹñ anasõmyhỹkre. Aõna aõna sõwemy ixidee tebutunymahãte kia atxukonana-ò.

4 Abaderòwysydỹñdu òwydỹñdu aõkõ dori kai Tate. Kai ixideele tebutunymahãte iribireny tawasinymahãte. Tiibohe rahinymy rirajuamyhỹreny tahe kia wysydỹñdu mahãdu

hina-ò Deuxu roholare. Tii ruru mahãdu wedu rare.

<sup>5</sup> Kaiboho abeòrarenny teõnonnytenyteri isikile. Ixideehyyle texideysadỹỹnnyhỹte. Ibutumy aõbo adeereny wiwi ixidee temytenynte, iwese rubutxudỹỹnatxu broreni riòwenymyhỹre wese. Kai ahãte. Deuxu akanarubunykre.

<sup>6</sup> Òbiti mahãdu teteõnymahãte terubunymahãte. Tii tiu adee rexiòwynyõtyhy.

<sup>7</sup> Ixieleeledỹỹõmy tahe waseriòreboho. Inynyrỹ kanakreu. Betehe inihe. Òworudu heka taaõwi riraòmyhỹre biu bedeu.

<sup>8</sup> Kia wese kaiboho tule eleelemy aõkõ biraðmyhỹke aworeny-ki beximymyhỹbenyke, Inynyrỹ nonana dori iòhòrehe.

<sup>9</sup> Waseriòreboho uritere wimy ibinamy ryberenyõmy Deuxu dori arahitxinyreny. Ihitxidỹỹdu nonana tahe iòhòre ijòkiwesele riijemy rỹimyhỹre.

<sup>10-11</sup> Waseriòreboho ihetxiu Deuxu rybemy rybedu mahãdu iyrubumy rỹiramyhỹ. Iwese tiiboho rỹiramyhỹwese boibeke aõhõkỹmy dỹỹnana-ki rare. Kia aõhõ kỹmydỹỹnana-ki òbitimy rotỹỹnnyhỹre. Iwese Jòò iyrubumy raremyhỹre taholamahãtenynte. Tule iwese ionanau Deuxu riwiòhenanyre wesemy teerytenynte. Inynyrỹ dori ruxetòenatyhy-di rare làhànatyhy-di.

<sup>12</sup> Ibutu ratyre waseriòreboho inatyhymy sohojilemy marybeke ijõ rybemy rybeõmyke Deuxu arybe ritxiõnyõtyhy. Aõna aõnamydỹỹnanaribike aõkõ iximyhyle marybeke. Kohemy marybekeu kohelemy marybeke. Aõkõmy

marybekeu, aõkõlemy marybeke. Kawese-ki inyõ aratxiõnyõkre.

<sup>13</sup> Inyõ aõbo ayreny-ki aõhõkỹmy rotỹỹnyreri. Tahe tai bexitõenykre. Inyõ aõbo ayreny-ki teysamy ratxireri. Àlanawi-di tii wana mawiunykre.

<sup>14</sup> Inyõ aõbo ayreny-ki webinadumy roireri wana. Tahe dohodỹỹna rybedu mahãdu-ò tamy bididybedenyke tamy rexitõenyrenykeny. Adỹỹ ityre ritxiwikemy Inynyrỹni òraru-ki.

<sup>15</sup> Ixitõedỹỹna tyhynale webinadu riteytenykre. Inynyrỹle ritamahỹỹnykre. Tii òraru-ò raòrarunymyhỹke-wana Deuxu iòraru riixãwidinyke.

<sup>16</sup> Iny wiò wiòmy aõna aõnarenymy belyybenyke. Wiò wiòmy wii biixitõedỹỹnybenyke, ibutu-ribi beytebenykeny. Inyòbiti ixitõedỹỹna irurudire, aõna aõna sõwemy riwinymyhỹke.

<sup>17</sup> Eliasi heka inywesereny rare. Tii rexitõenyhyymyhỹre biu ràaõtyhykremy bede-ò. Tahe inataõ beòra-di biu ràaõhyyre.

<sup>18</sup> Tahe ixityre rexitõenyre. Tai biu ròare. Tahe oworu-ki ixityre aõwi ruhunyre.

<sup>19-20</sup> Waseriòreboho, inyõ ay-ki inatyhyna-ribi ròhònykeki. Inywitxira tuu rarybekeki, teòsary-ribi ridykeki, tahe itytytyby ritara, rubu konana ixãwina lau sõwemy araru-di riixãwidinyre. Kie.

## **Deuxu Rybe Tyyriti New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 18 Apr 2025 from source files  
dated 29 Jan 2022

55ce0bcd-101e-52a3-984e-847027efe150